



Neqinik eqqussinermi akitsuutit peerneqarnissaanik Naalakkersuisut peqquneqassasut Inatsisartut aalajangiiffigisassaattut siunnersuut.

(Inatsisartunut ilaasortaq Jens-Frederik Nielsen, Demokraatit)

(Siullermeerneqarnera)

Demokraatiniit Inatsisartumut ilaasortamut Jens-Frederik Nielsen-imut siunnersuumut pitsaasumut qujanaq.

Kialluunniit qularutigissanngilaa, Demokraatit kissaatigimmassuk, Kalaallit Nunaanni inuuneq najugaqarnerlu akikinnerusariaqartoq. Maannakkorpiaq inuppasuaqarpoq, ilungersorluinnartunik nunarsuarmi inissisimaneq pissutigalugu, aningaasaq nalikillingaluttuinnarpoq ulluinnarnilu atortakkat ilaqutariinnut ataasiakkaanut akisunerulerlutik.

Siorna Demokraatiniit kaffit, the timmissallu akitsuutaasa peerneqarnissaat annertuumik sorsuutigaarput. Tamannalu Aningaasanut Inatsisit isumaqatiginninniutigineqarneranut atasumik iluatsissimallugu, tamatumalu kinguneraa, taakku atuisunut qangamiit akikinnerulersimanagerat.

Neqit akitsuutaasa peerneqarnissaannik siunnersuutip uuma taanna nanginneraa, suliallu tamakkiisup ilagalugu maani nunatsinni inuuniarnerup akikinnerulersinnissaa.

Pingaartuuvoq, ilaqutariit ataasiakkaat taakkulu inuuniarnermikkut atugarisaat ukkatariuassallugu. Neqit akitsuutaasa peernerisigut ullormut taqualiorneq ullormullu unnukkorsiusiorneq akikinnerulersissavaat. Piffissami uani tamanut assammik isaassinerussaaq pitsaasoq, aningaasap nalikillinerata kingunerisaanik aningaasaqarniarnermikkut ilungersuuteqartunut.

Una siunnersuut pingaaruteqarpoq, piffissami kingullerpaami takugatsigu, Naalakkersuisut partiillu maani nunatsinni inuuneq najugaqarnerlu akisunerulersinniarsarigaat. Siullermik IA-p Aningaasaqarnermut Naalakkersuisuutitaanit, biilinu akitsuutip qaffannissaanik kissaateqarluni, kingusinnerpaamillu Siumut siunnersuuteqarluni tiit, kaffit timmissallu akitsuutaat qaffaqqinneqassasoq.

Demokraatit isumaqarput, pitsaanngitsup tungaanut ingerlanerusoq. Akitsuutit appartittariaqarput, ilaqutariillu aningaasat namminneq atorsinnaasaasa annertusinissaat qulakkeerlugu, ulluinnarni inuuniarnerat oqinnerulaalersillugu.

Una siunnersuut Inatsisartunut ilaasortamit Jens-Frederik Nielsen-imit siunnersuutigineqartoq pitsaasuvoq tapersersornarlunilu. Akuerineqarnissaa innersuussutigaarput Aningaasanut- akileraartarnermullu ataatsimiititaliami suliareqqitassanngorlugu.